

L E

no. 19

RETOUR
DU SOLEIL
A PARIS,

ET REMERCIEMENT DE
ladicte ville au Roy, de la Paix que sa
Majesté a donnée à ses subjets.

AVEC VN ADVIS SALVTAIRE
à Messieurs de la Rochelle.



A PARIS,

Chez la veufue PIERRE BERTAVLT, au mont
sainct Hilaire, à l'Estoille couronnée.

M. D. C. XXIII.

RECEIVED

BY THE

SECRETARY

OF THE

WAR DEPARTMENT

WASHINGTON

NOV 10 1864

TO THE

GENERAL

OF THE



A MONSEIGNEVR,
MONSEIGNEVR LE
BAILLEVR, CONSEILLER
DV ROY EN SES CONSEILS
d'Estat & Priuè, Lieutenant Ciuil, &
Preuost des Marchands de la ville de
Paris.



ONSEIGNEVR,

Puisque i'ay l'heur & l'honneur
d'estre dans la Nauire, de laquelle vous tenez
aujourd'huy le gouuernail, & que ie participe à
la ioye que ceux qui s'y trouuēt embarquez ont
du retour heureux du Roy & bon succez de son
voyage; il est raisonnable que ie vous adresse le
remerciemēt que faict à sa Majesté, cette ville
tant deuotieuse à son seruice, pour la paix si bien
acquise par sa valeur, si dextremēt menagee par
sa prudence, & si benignement departie par sa

clemence. Receuez-le dōc, Monseigneur, d'une
telle affection qu'il vous est adressé, pour l'acquit
de mon devoir, & pour le vœu que ie fais de de-
meurer à jamais,

MONSEIGNEUR

Vostre tres-humble & tres-
obeyssant seruiteur, L. G.



L E

RETOUR DV SOLEIL A PARIS.

Et remercement de ladicte ville au Roy, de
la Paix que sa Majesté a donnée
à ses subiects.

*Avec vn aduis salutaire à Messieurs
de la Rochelle.*



Eux-là, ce me semble, n'ont pas mal rencontré, qui ont dict que le Soleil estoit le plus franc, & le plus libre de tous les Dieux, parce qu'il commande à tous, n'est commandé d'aucun, les veille tous, & nul ne le peut veiller, & ce qui est plus excellent, il conduit son chariot luy-mesme.

La France n'a iusques icy manqué de Soleil, car autant de Rois qui l'ont gouvernée, singulierement ceux que la tyge du grád & pieux saint Louys luy a fourny, ç'ont esté autant de Soleils qui l'ont successiuement éclairée, mais d'une clarté bien differente: Aussi combien que le Soleil soit de soy parfaitemēt clair & lumineux, neantmoins il est quelquefois appelé noir, non qu'il degenerate de sa nature, mais par des empeschemens de nuages & brouillars qui s'espoississent entre luy & nous: de mesme, combien que tous les Rois que la France a euz

ayent esté les claires images de Dieu en terre, comme le Soleil l'est au Ciel, & aussi grands les vns que les autres, quât au pouuoir qui leur a esté dōné de Dieu, & à l'honneur qu'ils ont eu de le représenter icy bas; Toutefois il s'en est veu quelques vns que l'on a peu iustemēt appeller *noirs*, par des actions mauuaises qui se sont mises au deuâr de ceste Royale splendeur qui leur auoit esté donnce de Dieu: les autres ont conserué par leur vertu ceste clarté naturelle.

Et sur tous voicy le tien, *Paris*, ton autre Auguste, ton deuxiesme reconquerant les mesmes pays qui auoient autrefois esté distraicts de l'obeyssance de son grād Ayeul *Dieu-donné*, comme il les a trouué distraicts de la sienne. Il te reuient honorer de sa presence, tout brillât de gloire & d'amour par la paix que sa valeur t'a donné, lequel tu peux vrayement appeller *franc & libre*, puis qu'il s'est esleué par dessus tous ses predecesseurs, & si tu l'as veu, & tu le voy conduisant son chariot luy-mesme, en ceste course & carrière en laquelle ses deuanciers & leurs plus anciens Conseillers d'Estat auoient apprehédé d'entrer.

Hé pourquoy dis-je *son retour*? A-il esté absent? A-il pas esté tousiours en nos cœurs, & present dans le plus delié de nostre imagination, & de nostre affection? Estoit-il pas de telle grâdeur qu'il esclairoit par tout son Royaume? Vn Gouverneur, vn Chancelier, vn premier President, tant de bons Cōseillers d'Estat, ce Parlement si auguste, ces autres Compagnies souueraines si venerables, vn Lieutenant Ciuil & Magistrats politiques, vn Præuost des Marchands, Escheuins & Officiers de ville, restez icy, estoient-ce pas les rayons par lesquels nous l'auons veu cōme dans vn miroir, lors que nous ne l'auons peu veoir luy-mesme? L'auons-nous pas veu sur la face des Magistrats, ores qu'il fust bien esloigné de nous? Ouy certes, il estoit bien chez nous par puissance, & par affection, mais il faut auoier que la chose vraye est tousiours plus parfaite que l'image: & que tout ainsi qu'entre les

esprits influens, l'esprit animal est plus excellent, a plus d'efficace, de vigueur & de vertu que l'esprit vital, & que l'esprit naturel, parcé qu'il est engendré de la plus subtile partie de l'esprit vital dans le cerueau qui est le siege de l'ame, là où l'esprit vital n'est engendré que de l'esprit naturel dans le cœur, & le naturel de la vapeur du sang dans le foye. Aussi le Roy qui puise l'estre & l'origine de sa puissance dans le Ciel (cerueau de l'vniuers) de cet *Esprit*, qui anime les Roys, conforte nos sens d'une vigueur plus releuee que les Magistrats qui le representent. Et puis nous n'auons veu depuis le bon saint Louys, aucun Roy, aucun Soleil en Frâce, qui n'ait esté troublé de grosses vapeurs, de factions, de rebellions, de cabales, d'imperfections, & sur tout, d'heresies insupportables & dangereuses. Mais le reuoicy qui se represente à toy en son premier lustre, & en ceste mesme ou plus luisante splendeur qu'il estoit en la personne de S. Louys son grand ayeul. Le reuoicy tout clair, apres auoir purifié son Estat des broüillars qui pouuoient alterer sa lumiere, purifié, dis-ie, par sa vaillance, & par les sages & vertueux aduis, & conseils de ceux qui l'ont assisté, qui sont les rayons qui luy ont fait iour parmy les airs les plus grossiers, que les mouuemens des opinions différentes, & des rebellions d'aucuns, luy mettoient au deuant. Tu le reuois, Paris, tout nouveau, quoy que non dissemblable, sortant d'un hyuer broüillé de sang & de miseres pour se monstret à toy dans les iours agreables d'un amoureux Printemps que la paix te presente.

Estant entré dás le cours de son regne par le Mouton, signe tout plain de douceur & d'amour, il ne paroist pas plustost sur nostre Orizon, qu'il ne se voye obscurcy d'une espoisse nuee, suyvie de plusieurs autres, & d'infinis broüillars, qui conuertissent en nuicts plusieurs beaux iours que son aduenement auoit promis, & changent en ennuis les contentemens que son aurore presentoit. Il poursuit neantmoins toujours il ne se desespere point de ces

ce genereusement ses rayons là dedans , faiët tant qu'il entre dans le Lyon, pour anticiper les mauuaises influences qui menaçoient la Vierge, regardée de trauers de Saturne & de Mars', & rend la vigueur aux pauvres François qui se reposent pour vn temps sous vn vmbre de paix que Sainte-Manchoud leur procure.

Mais aussi-tost d'autres obstacles luy viennent au deuant: de là plusieurs prennët occasion de s'offrir à la conduite & gouuernement de son Chariot, sous pretexte de le soulager au plus fort de sa carriere: mais il ne perd point cœur, il ne lache point prise, il resserre les resnes, & ne veut courir la fortune du desordre qui pourroit aduenir, si ces conducteurs, pour faire indiscrettement paroistre leur courage, venoient à repousser ses cheuaux iusques au Ciel des Estoilles, & hazarder son Char à quelque cheute honteuse, au grand domage de ses pais & de ses peuples.

Il prend donc ses affaires en main, il continuë son cours, ne le faiët pas neantmoins tout droict & rapidement par les cinq cercles, il n'vse pas de prim-abord de sa valeur, de ses moyens, de son autorité, de sa force, de son credit, il tire son chemin de trauers & en escharpe, il se courbe en large, il n'approche que de bien loin du Pole Austral, ny de l'Ourse ioignante à l'Aquilon, publiant & faisant marcher deuant luy sa clemence & douceur à l'endroit des deuoyez, qui se voudront ranger au deuoir. Mais il ne deuale pas aussi trop bas, & par les mesmes publications faiët entendre son courage & resolution d'attirer par la force de ses rais les plus grossieres vapeurs, & les conuertir en foudres & tōnerres, pour les faire tomber sur les autheurs du mal, qui ne s'ēmeuent neantmoins pour cela, quoy qu'ils voyent que par la force de ses armes il a explané la voye à sa chaste Compagne, pour iouyr malgré l'enuie de sa douce conionction; ils ne laissent de remuer l'air & le broüiller, en sorte qu'ils le font

la chaleur de ses rais ayant penetré iusques au centre des cœurs plus froids, il faict reuoir le serain, du cêtre de son Royaume à Lodun, lequel estat aussi tost disparu, qu'apparu, les nuages se fendēt, les foudres éclattēt, en frapēt peu, en espouuentent plusieurs, ceux-cy prennent subiet de ressentiment par la ruine de ceux-là, & l'aneantissement des vns ayant ouuert le chemin à l'ambition des autres, tout se rebrouille, en sorte qu'il est contraint de s'armer de sa vigueur naturelle pour se faire voir par dessus tout.

Il marche aussi tost, il entre en Normandie, y fait vne telle reuerberation, que les nuées rougissent, les factieux luy demandent pardon, ceux qui tiennent les plus fortes places n'osent attendre ses foudres, & ceux qui cherchēt du lustre dans ces feux, se trouuent bien esloignez de leur compte.

Il gagne donc le dessus : mais d'autant que le mouvement circulaire est plus parfait que le droit, parce qu'il ne penetre ny violente : il ordonne à son cours vn mouuement oblique, lors principalement qu'il est en son solstice, & que toute ceste Prouince est sous-mise aux loix de ses influences : il ne se monstre violent ny rapide, il courbe lentement son chemin vers la riuere de Loyre, afin de purifier les courages, & alentir les desseins opposites de ceux qui s'y sont arrestez. Si tost qu'il y arriué, on voit disparoistre les nuages qui auoient broüillé l'air, le Pont de Sé est esbloüy, ses rayons consomment les vapeurs qui s'estoiēt eleuees sur Angers, & le Royaume est esclaircy par sa clemence.

Ces tourbillons neantmoins, auant-coureurs de plus grands orages, le font resoudre à consumer les vapeurs qui les entretiennent. Il preuoit que les factiōs qui peu à peu font corps d'Estat dans son Estat, peuuent donner esperance d'appuy à des émotions nouvelles, comme elles ont seruy d'entretien aux passees, il arreste de les aneantir du tout.

Les nerfs esloignez de leur principe sont plus durs que ceux qui en sont proches. Ce durillon qui s'estoit engendré d'as les cœurs des Bearnois esloignez de luy, sembloit estre incapable de recevoir ses douces influéces; il en approche, Pau se rend maniable, Nauarrin ploye, Ortés, Lescar, Sauue-terre, Oleron, & tous les Nerfs de cet Estat s'amolliſſent, apres que Lestourre & le Mont de Marsan luy ont rendu le deuoir en Guyenne.

Puis afin de donner loisir aux Rochelois (sur lesquels il pouuoit lors faire vn grand effort) de prendre exéple sur ceux-là: Il se fait reuoir à toy, Paris, mais en passant seulement: car ses affaires l'appellent ailleurs, pour acheuer plus facilement ce cours, que l'on iuge tât necessaire à la conseruation de son Estat & autorité; il passe outre, & tire vers l'endroit, duquel les vns apprehendoient, & les autres se promettoient (mais en vain) qu'il pourroit venir quelque secours. Les frontieres se resiouyſſent en ses approches. Amiens, Montrueil, Calais, Boulongne, toute ceste coste de l'Ocean le reçoit avec allegresse, & monstre l'affection qu'elle porte à son seruice, aux honneurs qu'elle rend à celuy qui possede ses faueurs.

De Calais, il lance vn de ses rais, qui va porter en Angleterre les nouuelles de ses resolutiōs, avec tant d'éclar, qu'on n'y voit ny raison, ny moyen de s'y opposer. L'Allemagne iuge que force luy est de les tolerer, la Hollande y acquiesce, après que les Pyrenees & les Alpes les ont benistés.

Ayant remis entre les mains des Ecclesiastiques de Bearn les biens donnez au seruice diuin, & rendu à Dieu ce que la tollerance de ses predecesseurs auoit laissé perdre, il ne luy restoit qu'à recouurer le sien propre, & se faire iour dans les pays ausquels il auoit peu de lumiere.

Helas! faut-il que ie parachute ce cours, & que ie face voir les nuées rouges, non plus par la reuerberation des rayons de noltre Soleil, mais par le sang sorty de tant de veines, & en telle quantité, que les cœurs qui le ver-

roient, en pourroient entrer en foiblesse? Non certes, il n'est pas raisonnable de le faire rejaillir vne autrefois, il ne m'est pas loisible de faire voir icy les raisons qui l'ont porté à la guerre contre ses subiects de la Religion pretendüe reformee, puis qu'il a pleu à sa Maïesté par sa clemence incomparable, adoucir ces aigreur, & enseuelir toutes rancunes aux pieds de l'oliuier.

Je ne veux pas aussi leur représenter l'admirable conduite, de laquelle Dieu a vſé au chastiement de la presôption qui leur a esté souuent reprochee par le plus iudicieux de leurs Ministres, ny leur mettre en memoire les predictiôs que leur fit Môseigneur le Mareſchal de Lesdigueres à present Cōestable de Frâce, en l'annee 1615. lors de la trāslation de leur assemblee, de Grenoble à Nismes. Mais sous leur bon plaisir, ie leur feray veoir deux choses, la verité desquelles estant constante & asseuree, ils ne trouueront cy apres aucun legitime pretexte, ny apparence de iustice en leurs armes.

La premiere touche, le general de leur cause, à ſçauoir, qu'il est certain que le Roy n'a eu, & n'a aucune intèrion de les troubler en leur conscience & liberté de l'exercice de leur Religion. Et la seconde, regard particulieremēt la ville & gouuernemēt de la Rochelle, qui neantmoins s'estend au general, puisque leurs assemblees se font en ladiète ville, & qu'ils en font le donjon, dans lequel ils assuret leur force & leur retraicte. Et ce deuxiesme point sera pour les detromper de l'erreur populaire qui les a possédez iusques icy, en l'opinion que le vulgaire s'est donnee, qu'ils ont obligé les predecesseurs du Roy, lors qu'ils se sont distraits de la domination des Anglois, pour se mettre en l'obeyſſance des François, sur laquelle erreur ils ont assis les fondemens de plusieurs mauuais discours qu'ils ont faict entendre en ces derniers mouuemens.

Quant au premier point, le Roy leur a monstré dès le commencement sa candeur, quād il s'est contenté d'auoir donné force à ses Edicts de Pacification en Royn

pour ce qui concernoit la Religion Catholique, laquelle il n'a faict que reſtabliſſir, ſans opprimer la Proteſtante, cōbien que tout cet Eſtat luy euſt faict joug, & l'on y veoit maintenant vne liberté reciproque des vns & des autres, quoy que ſa Maieſté y ſoit entierement abſoluë. Chacun ſçait, que lors de ſes plus ſignalees victoires, & priſe des villes plus importantes, il a cōmandé aux Miniſtres, qu'ils continuäſſent leur miniſtere accouſtumé, pour monſtrer qu'il ne vouloit forcer leur croyance, ains retirer ſeulement ſes villes, apres les delais de les rendre tant de fois expirez. S. Iean d'Angely, Tōnins, Clairac, & autres l'ont éprouué au premier voyage. Et quand les émotions populaires leur ont voulu donner du trouble és villes auxquelles les Catholiques ſont les plus forts; a-il manqué d'en faire & ordonner des chaſtiemēs exemplaires, pour venger autant l'iniure faicte à ſa foy, qu'à la cauſe de la dicte Religion. La ville de Tours en pourra teſmoigner, & le bon ordre donné à Paris par Meſſieurs les Gouverneur & Magiſtrats en ce mouuement inopiné qu'excita la lie du peuple, lors du regret ſenſible que donna la nouuelle de la mort de Monſieur le Duc de Mayenne, mōſtre aſſez combien ſa Maieſté a eſté ſoigneuſe de faire conſeruer la liberté de conſcience, par le chaſtiement des ſeditieux en la place principale de la ville: combien que ceſte ſedition euſt frappé vn plus grand coup contre les Catholiques, le nombre deſquels ſe trouua plus grād entre quinze ou vingt que morts, que bleſſez, ce qui a monſtré que ce n'eſtoient que des voleurs qui l'auoient excitee.

Si Meſſieurs de ladite Religion Pretendue Reformee veulent vne plus grande ſatisfaction, & s'ils demandent de plus grandes aſſeurances contre ces émotions ſubites & inopinées, qu'ils aſſeurent dōc les Catholiques de l'éuenement des leur, & qu'ils facent raiſon des barbaries exercees de ſang froid par leur populace à Mōtauban, & ailleurs, cōtre le ſieur de Frete, Gouverneur de Chartres, & autres Seigneurs priſonniers de guerre tōbez en leurs

maines durant les assauts & escarmouches, & qui pis est, cōtre les Herauts du Roy, qui sont des personnes sacrees & inuiolables, comme ils ont monstré deuant Clairac, S. Antonin & plusieurs autres endroits. Ont-ils peu preseruer de ces fureurs populaires les sieurs de Boissé à Sainte-Foy, & du Cros President de Grenoble à Montpelier, quoy qu'ils fussent de leur profession?

Tous ces rauages de seditions excitees de part & d'autre par des gens de neant qui cherchent leur vie dans le trouble, & à qui toute religion est indifferēte, ne doiuent point seruir de pretextes de deffiāces aux vns plus qu'aux autres, ains doiuent estre prises pour vne intemperie de saison, qui moissonne les champs de tous en general. Au contraire, il faut que les Catholiques & les Protestāns dorment en repos, sous la foy de la Paix, & considerent pour l'innocence du Roy, que l'exemple du mal-heur d'autrui, faict qu'un chacun fuit le mal, & recherche naturellement son bien. Le Roy Henry III. se trouua bien empesché, quand la Ligue, qui se disoit estre le party des Catholiques, luy demanda des villes de seureté, contre les Protestans, appuyez du support de plusieurs grāds Princes, partialisez avec les estrāgers, aussi bien que la Ligue: car il scauoit qu'il ne pouuoit, & ne deuoit estre moins fauorable à ceux de sa croyance, qu'aux autres, ny refuser aux Catholiques leur seureté contre les Protestans, qui s'estoient cantonnez au de là de la riuere de roire, puis qu'il auoit asseuré les Protestans contre les Catholiques qui auoient pris leur partage par deçà, pour estre plus aysemēt secourus des Espagnols, avec lesquels ils s'estoient liguez; Il voyoit neantmoins que ce faisant il seroit depouillé du tout, & demoureroit opprimé entre les deux: aussi se trouua-il accablé sans y pouuoir dōner ordre, car les deux partis diuiserent son Estat, & ne luy resta que le tiltre, encore bien foible, de Roy, ce tiltre luy estant bien-tost enleué par la mort.

Le Roy ne veut entrer en ce conflict, il est bien seruy.

bien honoré, bien chery des Catholiques, qui ne veulent autre assurance que la foy & parole qu'ils ont receu de sa Majesté en son sacre (aussi la loy de ce Royaume n'oblige point le Roy à d'autres seuretez enuers ses subiets) Pourquoy les Protestans ne s'en cōtenteront-ils. Et puis qu'il auoit la volonté de les maintenir, témoignée par les effects, & tant de sermens & d'assurances publiques en ses Edicts, & la force en la main pour ce faire, eust-il esté raisonnable qu'il eust laissé negligemment perdre l'occasion de s'affranchir d'un tel incōuenient, puis qu'il auoit le moyen de se rendre comme il luy appartenoit, le maître des vns & des autres, & faire viure tous ses peuples en bonne vnion & concorde, sous l'assurance de sa foy, sans entrer en partage, diuiser son Royaume entre luy & ses subiets, & rendre ceux de sa Religion en pire estat & condition que ceux qui font profession contraire, mettās ceux-cy à couuert sous des bonnes & fortes villes, & laissant à ceux-là le seul ciel & la campagne pour retraite. Je ne puis passer cecy sans donner vn traict de louange à la memoire du feu sieur d'Eure de ladicte Religion Protestāte, qui neātmōins est mort glorieusement deuant Clairac, au seruice du Roy. Je suis nay sujet de sa Majesté (ce dit-il à ceux qui luy reprochoient qu'il cōbatoit contre ceux de sa Religion) je suis obligé à son seruice, l'exerce librement ma Religion, il ne nous est faicte aucune violence en l'exercice d'icelle; tant que ie jouiray de ceste liberté, ie viuray & mourray à son seruice. Et apres l'exemple de tant d'autres Seigneurs de ladicte Religion, singulierement dudit Seigneur Duc de Lesdiguières, & du Seigneur Doriac, qui a campé le premier deuant saint Iean d'Angely, desquels les affections & les espees ont rousiours esté loyales, ils ne doiuent plus demander d'autres assurances.

S'ils veulent des exemples des pays estrangers, ils n'ont qu'à jetter les yeux sur l'Angleterre, pour voir si le Roy de la grand' Bretagne dōne des villes de seureté aux

Catholiques, qui sont reduits à l'estroit, & n'approchent de la franchise que les Protestans ont en France. Franchise si grande, qu'il ne se peut rien dire de plus, puis qu'apres les villes, ou prises, ou reduites, sa Majesté y ordonne & laisse des gens de guerre pour leur tenir main-forte à la iouïssance de cette liberté.

Reuenez dōc au sens commun, Messieurs de ceste opinion, ne vous esloignez point de la raison qui vous porte à la confiance que vous deuez auoir en la foy du Roy, ne pretendez point de conuertir vne concession à temps, en tiltre de possession perpetuelle. Donnez à cognoistre par vostre obeyssance, que vous auez esté taxez sans raison, de vouloir faire vn Estat dans l'Estat du Roy vostre Seigneur, au démembrement de sa Couronne, & rauallément de son autorité, puisque vous auez les preuues de sa bonne volonté; leuez toute deffiance, puisque vous & nous sommes tellement liez par accoustumance, par societez, par correspondances, par alliances estroites, que nous pouuons & deuons estre tous appelez vn seul peuple viuant sous vn mesme Roy, & sous vne mesme Loy, quoy que sous vne differente foy.

Et puisque la raison & la paix que le Roy nous dōne, est suffisante pour nous oster la deffiance, quel pretexte peut-on auoir de se cantonner? Je parle maintenant à vous, Messieurs de la Rochelle, qui auez iusques icy tenu des assemblees & des cōseils comme en vn Estat souuerain, & auez veu ces iours passez courir patmy le vulgaire d'entre vous, ceste erronee venterie, Que vos predecesseurs ont obligé nos Roys, quand ils les ont recognus, & se sont retirez de la seruitude des Anglois.

Car pour venir au second poinct, lors que vos peres se sont affranchis de cet esclavage, ils estoient purement subiects du Roy, & auoient trempé dans la rebellion autant de temps qu'ils auoient rendu l'obeyssance à l'Anglois. S'ils sont r'entrez en leur bons sens, & s'ils ont recognu le seruice qu'ils deuoient au Roy leur Seigneur,

ils ont satisfait au deuoir auquel ils estoient obligez par la nature, & par la naissance de l'un & de l'autre. Permettez-moy de vous dire que vous ne pouuez reprocher cela, sans rafraischir la memoire de la felonnie de vos peres, d'auoir obey si long temps à vn Prince estrange. Et Pierre Chaudier leur Maire abusant le Gouverneur Anglois en la monstre d'un Tournoir hors la ville, pour la rendre au Roy son seigneur, n'a fait que reparer la faute que ses predecesseurs auoient faite, en se laissant assubietir par l'estrange, & soustraire de l'obeyssance qu'ils deuoient à sa Majesté, à laquelle, & la ville de la Rochelle, & tout le pays d'Aunis appartenôient.

Et pour le monstrer clairement, & leuer ceste erreur qui est en vigueur parmy vous, que vòs deuôciens se sont donnez au Roy de France estans subiets du Roy d'Angleterre, il faut sçauoir (sans nous donner la peine de mettre en auant les possessions qu'en ont eues nos Roys, de la premiere & seconde branche) Que de toute ancienneté les Roys d'Angleterre qui sont issus des Ducs de Normandie, ont esté vassaux des Rois de France, tant à cause de ladicte Duché de Normandie, qu'à cause d'autres terres & seigneuries qu'ils ont depuis tenuës mouuantes immediatement de la Courône de France, & par consequent iusticiables & obligez à respondre pardeuant les Estats & Parlemens de France. Cela ne peut estre reuôqué en doute, puisque toutes les Histoires Françoises & Angloises en conuiennent, & sont pleines des hommages rendus par les Rois d'Angleterre aux Rois de France, de leurs subiections aux Estats & Parlemens (car anciennement les Estats & le Parlement n'estoient qu'un) * des assignatiôs qu'il leur y ont esté donnees, des obeyssances qu'ils y ont renduës, & de leurs assistances & comparutions comme vassaux, aux sacres & couronnemens des Roys de France.

Ce fondement jetté, il faut sçauoir que Guillaume le

Bastard fut le premier Duc de Normandie , qui deuint Roy d'Angleterre , & ce faisant rendit le Roy d'Angleterre vassal du Roy de France. Aussi Henry premier du nom, dernier fils dudit Guillaume, ayant succédé à son pere aux Royaumes d'Angleterre & Duché de Normâdie, fit hommage de ladite Duché au Roy de France Louys le Gros sixiesme du nom. Ledit Henry n'eut que deux enfans, fils & fille , le fils nommé Guillaume se noya en mer du viuant du pere , & Mahault sa fille fut mariee en premieres nopces à l'Empereur Henry cinquiesme du nom, duquel elle n'eut enfans , & en secondes nopces à Geoffroy Comte d'Anjou, Touraine , & le Maine, duquel elle eut Henry deuxiesme du nom, qui succeda à son ayeul Héry premier aux Royaume d'Angleterre, & Duché de Normandie, à cause de ladite Mahault sa mere, & ausdits Comtez d'Anjou, Touraine, & le Maine, mouuans de la Couronne de France, à cause dudit Geoffroy son pere. Et par ce moyen ledit Roy d'Angleterre fut fait doublement vassal du Roy de France. Ledit Henry II. espousa Leonor, repudiee du Roy de France Louys septiesme du nom, dit *le Jeune*. Et d'autant que de ladicte Leonor dépend l'esclaircissement de ma pretention contre Messieurs de la Rochelle ; Il est besoin que ie dise qui elle estoit , & que ie parle vn peu d'elle , & puis ie reuiendray audit Henry, second son mary.

Guillaume quatriesme du nom , Comte de Poictou , & Duc d'Aquitaine , cinquiesme du nom , n'eut point d'enfans masles , ains deux filles, dont l'aînée fut ladicte Leonor, appelée Alienor en la Chronique manuscrite tiree des Chartres del' Abbaye de Moustier. neuf de Poictiers , & faicte du temps dudit Seigneur Roy Louys le Jeune, & du Roy Philippes Auguste son fils , de laquelle Chronique ie tire ce discours , & à laquelle s'accordent tous les bons auteurs qui ont escrit depuis.

La fille puîsnee dudit Guillaume fut Peronelle.

Ce Guillaume estoit vn Prince mal viuant, grandes

ment desbauché & dissolu en sa vie. Le bon saint Bernard Bourguignon, amateur des Comtes de Poictou (par ce qu'ils estoient descendus des anciens Rois de Bourgongne qui estoient du sang Royal de France, & dont ils auoient receu leur pays en appanage) & curieux du salut de l'ame dudit Guillaume, le vint admonnester en sorte, qu'il se retira de sa mauuaise vie, & s'estant iceluy Guillaume disposé à la penitence, donna ses deux filles en garde aux habitans de la ville de Bordeaux, avec le gouvernement & administration de leur bien, apres auoir assigné en partage à Leonor aînée, les Duché d'Aquitaine, & Comté de Poictou, & à Peronnelle puisnée, les terres qu'il auoit en Bourgongne, & ordonné par son testamēt le mariage de ladite Leonor avec ledit Louys fils du Roy de France Louys le Gros.

Voila donc le pays d'Aunis, la ville de la Rochelle, & toutes ses appartenances en la Seigneurie de ladite Leonor, lesdicts pays neantmoins tousiours mouuans de la Couronne de France. Aussi en auoient-ils faict partie dès la premiere branche de nos Rois. Et les Rois d'Aquitaine ayans decliné en tiltre de Ducs, ce tiltre encore de Duc fut tellement rauulé par Charlemagne, en la deuxiesme, qu'il les fit appeller, *Ducs Officiers*, comme qui diroit, *Hommes Liges*, ou *Vassaux* des Roys de France. De faict du temps de Philippes Auguste, on a veu en vn vieil chapitre de l'Abbaye de Clugny, que Guillaume premier du nom, Comte de Poictou, & Duc d'Aquitaine, inhumé en ladite Abbaye, y est qualifié *Duc Officier d'Aquitaine*. Je ne sçay si ledit chapitre s'y voit encore, mais quant audit Guillaume, on l'y voit avec deux Bânières, l'une d'azur à trois bandes d'or à la bordure de gueules, qui estoient les armes des Côtes de Poictou, & l'autre de Loranges d'or & de gueules, qui estoit la banniere des Ducs d'Aquitaine, & qui estoit aussi celle des premiers Comtes d'Angoulesme, appelez *Taillefer*.

monde, choisi la solitude en Toscane, & commencé ceste compagnie de Religieux, dits de son nom *Guillemain*, & que nous auons appellez à Paris, *Blancs-manteaux*; Le Roy de France Louys le Gros, voulut accomplir le testament d'iceluy Guillaume, & afin de reünir à la Couronne de France ces beaux pays de Poictou & d'Aquitaine, fit espouser ladite Leonor audit Louys le Jeune son fils, apres l'auoir fait sacrer & couronner Roy de France de son vivant, par le Pape Innocent deuxiesme au Concile de Rheims.

Louys le Gros estant decedé, le Roy Louys le Jeune son fils Roy de France, fit vn voyage en la terre Saincte, où il mena la Royne Leonor sa femme, & y conceut d'elle vne mauuaise opinion, parce que Saladin le Souldan, chef des ennemis du Christianisme, auoit par quelques actiōs donné tesmoignage qu'il luy vouloit du bien, aussi estoit-elle accomplie en toute sorte de graces qui pouuoient dōner de l'amour, iusques-là que les nostres se persuaderent, que si ladite Dame eust voulu, elle eust bien mis le Saladin entre leurs mains, sous l'attray de cet amour, mais elle qui auoit le cœur genereux refusa d'estre instrument d'une surprise qu'elle estimoit perfidie.

Quoy qu'il en soit, le Roy retourné en France la repudia, non toutefois par vne repudiation diffamante, mais par vne dissolution de mariage, sur pretexte de parenté, par les Prelats de son Royaume, en vn Concile national tenu à Baujency, par lequel ladite Dame fut remise en la liberté de sa personne & de ses biens, & ce combien que le Roy son espoux eust d'elle deux filles, à cause desquelles ils'attendoit que l'administration desdits pays d'Aquitaine & de Poictou luy demeureroit, sans considerer que ladiete Dame remise en la libre disposition de ses biens, pourroit se remarier *, & transporter en main estrangere ces belles Seigneuries, comme elle fit.

fut surnommé le Jeune, à cause de ce mauuais conseil. Mais les autres que ce fut pour le distinguer d'avec son pere Louys le Gros, qui l'auoit fait pour regner ainsi iustement avec luy.

Car elle ieune, belle, courageuse, & indignee d'un tel traitemēt, se remaria audit Roy d'Angleterre Henry II. & donna un tres-puissant ennemy à la France: car il estoit de par sa mere, Roy d'Angleterre, & Duc de Normadie; & de par son pere, Comte d'Anjou, Touraine, & le Maine, de par ladite Leonor sa femme, Comte de Poitou, & Duc d'Aquitaine, & ce faisant Seigneur par mer & par terre depuis Escosse iusques en Espagne.

De ce mariage sortirēt quatre fils, le premier fut Henry, qui mourut guerroyant son pere, le deuxiesme fut Richard surnommé *Cœur de Lion*, qui regna apres son pere & mourut sans enfans, le troisieme fut Geoffroy, qui eut de Constance Comtesse de Bretagne, Artus & Eleonor, & le quatrieme fut Iean, surnommé *Sans-terre*.

Richard estant mort sans enfans, & Geoffroy decedé durant le regne d'iceluy Richard son frere, Artus fils d'iceluy Geoffroy deuoit succeder à la couronne d'Angleterre, & aux Estats & Seigneuries susdictes par representation de son pere, à l'exclusion de son oncle Iean Sans-terre, dernier des quatre fils dudit Henry second. Neantmoins ledit Iean Sans-terre s'estant saisi de la personne dudit Artus son neveu, qui estoit son Roy, Prince legitime & naturel Seigneur, le precipita & tua en la ville de Chinon, fit mourir en prison sa niepce Eleonor seur dudit Artus, & se fit Roy par force & violēce tyrannique. *

Constance, Comtesse de Bretagne, mere desdits Artus & Eleonor, & vassallé du Roy de France, qui estoit lors le Roy Philippes Auguste, fils de Louys le Ieune, reclame la iustice du Roy, contre ledit Iean Sans-terre, aussi vassal du Roy, puis qu'il s'estoit emparé de tous ces Duchez & Comtez mouuans de la Couronne de France.

Le Roy Philippes assemble ses Estats & Parlement en la ville d'Estampes, pour deliberer sur le parricide & felonnie d'iceluy Iean Sans-terre, lequel fut confisqué par Arrest desdits Estats, lesquels quant & quant assignerent au Roy des deniers & moyens pour l'execution de leur

deliberation. Ainsi en vsoient les anciens Estats, & au lieu qu'en ces derniers siecles ils ont tousiours tendu à la descharge, ils se chargeoient pour donner au Roy les moyens de faire observer ce qui auoit esté arresté.

Cet Arrest fut mis és mains du fils du Roy, qui fut le Roy Louys huiëtiefme pere du Roy saint Louys, & luy fut donné vne armee, avec laquelle il entra dans le Poictou & l'Aquitaine, qu'il subjugua, print la ville de la Rochelle, & fut ce Roy Iean si bien pouruiuy, qu'il demeura sans terres (suiuant la prediçtion de son pere;) car les Anglois couronnerent Roy d'Angleterre & Duc de Normandie ledit Louys fils du Roy Philippes.

Voila donc la ville de la Rochelle reünie à la couronne de France par droit de confiscation & reuerfion de fief.

L'y voicy encore par vn autre droit plus plausible.

Ledsits Henry second & Leonor, outre les quatre fils* susdits auoient encores eu trois filles, la seconde desquelles appellee Eleonor, fut mariee à Alphonse huiëtiefme Roy de Castille, qui d'elle entre autres enfans eut Blanche mere du Roy saint Louys. et
r
E
P.

Ceste bonne vieille Leonor, veufue du Roy Henry II. ennuyee de voir son fils Iean Sans-terre ainsi spolié, pratiqua le mariage de ladite Blanche sa petite fille, avec ledit Seigneur Louys fils du Roy Philippes, & par le traité d'iceluy furent assignez en dot à ladite Blanche, & aux siens venans dudit mariage, ledsits Duché d'Aquitaine, Comtez de Poictou, Anjou, Touraine, le Maine & autres pays conquis sur ledit Iean Sans-terre, auquel on laissa seulement le Royaume d'Angleterre.

De sorte que voila derechef la ville de la Rochelle reünie à la couronne de France, par le traité d'vn mariage, les descendans duquel durent & regnēt encores auourd'huy, graces à Dieu, en la personne du Roy Tres-Chrestien Lo v y s nostre Seigneur, descendu de Robert quatriefme fils du Roy S. Louys, fils de ladiçte Blanche de Castille.

Si cela ne suffit, voicy encor vn troisieme droit, par lequel ladite ville de la Rochelle est demeuree absolument à la couronne de France : A sçauoir par le traité d'entre le Roy S. Louys, & le Roy d'Angleterre Henry troisieme, l'an mil deux cens cinquante neuf: traité neantmoins que ie ne puis alleguer sans participer au regret commun de tous les fideles Conseillers de cet Estar, par lequel le Roy S. Louys, *Meu de synderesse par bigots* (ce dit le sieur du Tillet) *sans estre à ce contraint ny obligé*, delassa à l'Anglois la terre que Alphonse Comte de Poitiers, frere du Roy Louys tenoit en Xaintonge outre la riuere de Charente, avec autres terres mentionnees audit traité, qui se voit au Parlement au thesor des Chartres.

ste
H. * Les autres terres deça ladite riuere de Charente, avec les Comtez de Poitou, Anjou, Touraine, le Maine, & le Duché de Normãdie, demurãs audit Roy S. Louys, sans que iamais l'Anglois ny ses successeurs y peussent rien pretendre. Par consequēt ladite ville de la Rochelle qui est bien auant au deça de la riuere de Charente, demura au François, de laquelle neantmoins, & de tous les pays au delà de ladite riuere de Charēte (fors Bordeaux & Bayonne) les Roys Philippes Auguste son ayeul, & Louys huietieme son pere l'auoient laissé legitime possesseur, tant par ladite confiscation, que par ledit traité de mariage d'entre son dit pere, & Blanche de Castille sa mere.

Ce traité estoit bien doux audit Roy d'Angleterre, & ne faut pas s'estonner si luy ny ses successeurs n'y ont apporté aucun trouble durant vn tres-long temps, & iusques au Roy Edoüard troisieme, lequel ayant gagné vne bataille à Crecy sur le Roy Philippes de Valois VI. du nom, entra dās le Poictou, le gasta, & prit la Rochelle par le succez de cette bataille : Mais le Roy Iean fils d'iceluy Philippes la reprit avec tout le Poictou, où ayāt reduit les Anglois à luy offrir des conditions fort aduantageuses pour reparation des dommages qu'ils auoient

fait en France, & à luy demander passage pour s'en retourner en Angleterre, le refus qui leur en fut fait, anima tellement ceste troupe desesperée, & quasi affamée en son camp, qu'ils presterent vn combat furieux, auquel les nostres assaillis en desordre se mirent eux-mesmes à vau-de-route, le Roy y demeurant prisonnier, mené en Angleterre, & les Anglois se rendirent derechef maistres de la Rochelle; Neantmoins ne la peurent si bien garder, que le Daupin Regent, qui fut puis apres le Roy Charles, dit le Sage V. du nom, ne la reprist, à l'ayde du Connestable du Guesclin, durant la prison du Roy son pere.

Toutes ces prises & reprises n'empeschent pas, que depuis le Roy Philippe Auguste, ladite ville de la Rochelle n'ait tousiours appartenu aux Roys de France, ayans pour fondement de leur legitime possession la confiscation de Iean Sans-terre, le traité de mariage du Roy Louys huitiesme, avec Blâche de Castille, le traité d'entre le Roy S. Louys & le Roy d'Angleterre Henry III. Et d'abondant ledit Edoiard troiesme & ses suiuan Roys d'Angleterre, ont confisqué par leurs felonies cõtre nos Roys, toutes les terres qui auoient esté delaissees par S. Louys audit Henry III.

Vous voyez donc, Messieurs de la Rochelle, que si apres toutes ces prises & reprises, Chaudier vostre Maire vous a deliurez par la vertu de la derniere vsurpation de l'Anglois, & retirez d'vne domination estrangere, à laquelle ses deuanciers s'estoient (peut-estre) trop laschement laissé soubz-mettre, il a seulement réparé leur faute, & a fait vn traitt auquel Dieu & la natute l'auoiet obligé. Il vous fierroit donc mal, apres estre bien informez de tous ces droicts que le Roy a sur vous, de luy reprocher ce deuoir que vos ayeuls ont rendu à ses successeurs, & ne pourriez desormais sans crime, refuser les conditions qu'il luy plaira vous proposer, puisque vous estes ses subjects, & que de toute ancienneté les Roys ses predecesseurs ont esté vos Souuerains. *Enuoyé par ces*

flattez point en vostre mal, & iugez quel ressentiment le
 Roy pourroit auoir, d'une desobeyssance inueteree, si
 pour vne simple nonchalance, esloignee de toute mau-
 uaise affection, le Roy Henry le Grand son père, Prince
 neantmoins fort debonnaire, a resserre les habitans de la
 ville d'Amiens d'une forte citadelle, accompagnee de la
 priuation de tous leurs priuileges. Ne vous laissez pas
 aller à la rebellion, sur le pretexte de vostre Religion,
 puisque, ni vous ni vos freres n'estes troublez en l'exerci-
 ce d'icelle. Le Roy a chastie, & veut que l'on chastie ceux
 qui vous y voudront troubler, vous en auez assuree par
 sa foy, portee par son Edict de Pacificatiō. La raison vous
 inuite plustost à vous fier à sa foy, que sa Majesté à tolerer
 vos entreprises: Prenez le meilleur conseil, & vous pro-
 posez, que comme c'est iniustice d'attenter contre sa vo-
 lonté, aussi est-ce folie de vous y opposer, l'assistance
 qu'il a du Ciel, & ses forces que vous auez esprouees,
 vous doiuent rendre sages pour l'aduenir. N'attendez
 pas que le sort des armes vous reduise à demander la vie
 à vostre Maistre & Seigneur, que vous auez aygry par
 vne opiniaistreté, preueniez sa iuste colere, apprehendez
 que comme les erreurs vous peuent priuer du secours
 du Ciel, aussi les rebellions vous esloigneront du support
 de la terre: Ne croyez point ces estrangers, qui ont trou-
 ué de l'azile & refuge dans vos murs, & considerez, que
 s'ils ont fait banqueroute à la fidelité qu'ils deuoient à
 leurs Princes naturels, ils ne seront pas portez à vous
 représenter l'obeissance que vous deuez au vostre; la
 raison qui vous appelle à ce deuoir vous doit faire ac-
 quiescer aux commandemens du Roy, plustost que de
 vous attendre à des esperances mortes: car les che-
 mins par lesquels vous auez eu du secours par le passé,
 sont bouchez: secours neantmoins qui n'est pas venu
 sur vostre seule consideration, & pour l'appuy des po-
 pulaces & communes auxquelles est maintenant reduit
 vostre foible Estat, ains des Princes & grands Seigneurs,

qui pour augmenter leurs péfions ou appanages, s'estoient
 ioincts à vostre party. Mais auiourd'huy tout cela cesse,
 toutes nos estoilles & ces flambeaux qui tirent leur lumie-
 re de nostre Soleil, ne regardét que luy: & ie ne scay si vous
 trouuerez desormais vn simple Gentil-hôme qui se vueil-
 le ietter en vostre desesper, apres que vos grands vous ont
 abandonnez; ils ont faict ioug, & se sont enanoüis deuant
 nostre Soleil, qui se fait voir maintenât sur vous & partout
 ailleurs: Si vous péfiez vous opposer seuls à son cours, vous
 le verriez poursuire si constamment sa voye, qu'il ne se dé-
 tourneroit d'vn seul poinct de l'écliptique, ni entrepren-
 dre autre affaire iusques à ce qu'il auroit paracheué ce
 cours, duquel il vous resteroit le blâme de l'auoir detour-
 né des plus importans affaires de son Estat, pour le prou-
 quer à vostre ruyne. Considérez d'auâtage que si quelque-
 fois parmy le trouble vniuersel de ce Royaume, vn Roy à
 qui l'on a donné le tiltre de Sage vous a peu retirer de la
 main des Anglois avec l'assistance d'vn Connestable Bre-
 ton, il n'y a point de doute que vous ne soyez bié-tost arra-
 chez d'entre les bras de ces estrangers qui vous possèdent,
 par nostre Roy, qui par dessus le tiltre de Sage, s'est acquis
 celui de Iuste, & auxquels tiltres vous avez adiousté celui
 de Conquerant: qui outre la faueur du Ciel, & la tranquil-
 lité de sô Royaume, a pour soy le souhait & seruice de tous
 les Grands de son Estat, les vœux de tous ses peuples, &
 l'assistance d'vn Connestable FRANÇOIS de BONNE odeur
 entre les gés de bien, qui n'a iamais adheré aux factions ci-
 uiles; bié que possédé iusques à l'annee derniere de l'erreur
 qui leur a souuent seruy d'appuy. Que pouuez-vous donc
 desormais opposer à nostre Soleil avec ce Mercure, * puis-
 que la puissance de celui-là pour se faire obeyr, est si bien
 secondee par la prudence de cetrüy-cy?

Et de là tous vos subiets prennét occasion de vous louer
 & remercier, SIRE, car c'est en cet acte que vous avez ad-
 iousté le tiltre de Sage à celui de Iuste. La puissance Roya-
 le est vn Soleil qui domine sur le Lyon seul, aussi est-elle si

* Les
 Stoiques
 faisoient
 de toute
 le monde
 une vil-
 le, & di-
 soient
 que la
 Soleil &
 Mercu-
 re en
 estoient
 les deux
 Magi-
 strats.

penetrante, qu'elle a, par maniere de dire, plustost bruslé qu'eschauffé. La Lune au contraire dominante sur le Cæcre, seul de nature plus temperee, échauffe peu à peu, & vous auez bieu sceu choisir vn Cōnestable courageux & prudent, qui a fait si vtilement reluire au profit de vostre Estat, ceste splendeur qu'il tire de vostre Majesté, tout ainsi que la Lune cōmunique à la terre toute la lumiere qu'elle emprunte du Soleil; qui a employé si doucement la force que Dieu vous a mise en la main, qui a sceu si bien vser de vostre espée sans la rougir, & attirer par prudēce plus que par force les plus obstinez rebelles au deuoir. Aussi la principale fōction d'un bon Connestable, ne consiste pas tant à monstrier nuë l'espée Royale, & pousser auant la gendarmerie, c'est à dire, emporter tout par la violence, qu'elle desire vne main adroite comme la sienne, pour bien asseoir le coup, & vn sage guide pour bien cōduire vos forces, en vser modérément, ne se point lascher passionnément à la rigueur, & estre tousiours plus prōpt à menacer qu'à frapper. Vostre espée ainsi portee deuant vostre Majesté, ressemble à ceste hache entortillee & empestree de mille nœuds & cordages, que le Consul à Rome faisoit porter deuant luy, afin que le mouuement prompt de la Souueraine puissance, fust alenty par l'espace du tēps qu'il falloit employer à la deuelopper, mais plustost par le sage aduis de celuy qui la portoit, lequel accourcissoit ou allōgeoit le temps en la dénouant, selon que la prudence luy faisoit cognoistre ou la grauité ou la legereté du mal.

A ce bon choix d'un Connestable si vaillāt & si prudent vous auez adiousté cettuy-cy, que vous auez faict d'un Gardes des Seaux, qui apres tant de bons & assidus seruices en vostre Conseil d'Estat l'espace de plus de quarante ans, s'est monsté LE fidel FEVRE & ouurier de la Paix, & s'est rendu digne de soulager pres de vous en ces expéditions laborieuses, les ans venerables, & le trauail d'un Chancelier incomparable, qui cependant a si bien cōduit vos affaires par deca, que la France luy en doit mille benedictions, &

Ces rayõs, Sire, ont fait reluire vos actiõs par tout, principalement en la Paix qu'ils vous ont conseillée, d'autant que de cette guerre (apres l'aneantissement de la rebellion) ne se pouuoit ensuiure perte d'hommes ny de villes, sinon à vostre desauantage, soit és personnes de vos subiets, soit en la desolation & ruine de vostre propre heritage. Ruine dis-ie, entiere, car quant aux demolitions que vous auez commandé d'estre faictes, des fortresses esleuees sans vostre commandement, elles sont grandement necessaires à la conseruation de vostre authorité, vtiles aux pauvres habitants du plat pays, loüables à ceux qui les agréent, & se contentent de vostre foy pour toute assurance.

Mais tant s'en faut qu'il faille dégarnir ces villes de fortresses, qu'au contraire il est necessaire d'y bastir & ordonner des bonnes Citadelles, j'entens des citadelles du sain& Esprit: Et au lieu de ces grâds ruelins, bouleuars, esperõs, demy-lunes, retranchemens & cazemattes, & de tant de Gouverneurs & de garnisons qui ne seruent qu'à espuiser vos finances, établissez-y de bõs Docteurs, qui ayent la parole & l'exẽple, pour imprimer par leur doctrine profonde & sainte vie, vne bõne croyance dãs les cœurs des pauvres ignorãs, afin de les attirer à cette vraye Religion, qui a esté si long tẽps bannie de leurs villes. Voila le seul moyen & le plus agreable à Dieu, de les reduire bien-tost, faire esuanouir ce fantõsme de Religion qui les auoit éludez iusques icy, & fermer les temples qui auoient esté ouuerts à l'heresie. C'a esté de cette façon que les temples des Payens se sont trouuez fermez d'eux-mesmes durant l'Empire du grand Theodose, aux loüables actions, duquel les vostres se rapportent. Et vous verrez, SIRE, qu'en vlsant de la sorte, il ne se trouuera pas vn Heretique en vostre Royaume dans dix ans: car dans ce temps-là les vieux opiniastrs ou se cõuertiront, ou mourront, cependant que les ieunes seront imbus de cette tant salutaire doctrine.

Or la France ne vous doit pas remercier seulement du choix que vous auez faict de ces bons Conseillers, & de ces

bons conseils, ains aussi de la conduite de laquelle vous auez usé si prudemment en vos victoires, laquelle, au iugement d'un chacun, a fait prosperer vos armes en sorte, que vous auez miraculeusement reconquis en l'espace d'un an, en trois petits voyages, des villes, que les plus aduisez selon les apparences mondaines, iugeoient ne pouuoir estre subiuguées en dix ans.

Car qui eust osé esperer qu'en passant seulement, vous eussiez reduit en Guyenne Lestare & le Môt de Marfais. En Bearn, Navarrin, Ortés, Lescar, Sauueterre, Oleron, en l'annee 1620. Puis en l'annee 1621. en deux mois reünny en vostre obeyssance toutes ces places, à sçauoir dans le Duché de Berry, Argenton, & Sancerre; dans le Duché d'Orleans, Iergeau, & Sully, ces quatre places par la bonne conduite de Monseigneur le Prince; dans le Duché de Normandie, Pontorson; dans le Comté du Maine, Saint Mars la Jaille, Fôtenay; dâs le Duché d'Anjou, Saumur (qui a fait le pont) & Vezins; dans le Côté de Poictou, Chastellerault, Lodun, Touars, la Grenache, Talmont, Fontenay le Côte, Saint Maixant, Maillezais, Marans, Niort; dans le Gouvernemenent de Xaintôge, S. Jean d'Angely, qui a donné le branle, par la force que vous luy auez fait esprouuer, Taillebourg, Pons; dans le Duché de Guyenne, Royan, puis apres reuolté & repris, Castillon, Sainte-Foy reuolté & repris, Mas de Verdun, Turéne, Puivrol, Caussade, Lairac, Musidan, Bergerac, Tonnins reuolté & repris, Lauauguyon, Tönins-la-force, Castels, Castel jaloux, Meillan, Nerac, la Tour de Brie, Mont-heurt, Monflanquin, Tournon, l'Isle-Iourdan, Caumôt reuolté & repris: en Quercy, Cardillac, Cadenac, Clairac: en Languedoc, la Parade, Foix, & apres ces deux mois, Montauban rasté, & trouué trop enduré pour ployer, vostre Majesté déposant son courage Royal pour prendre celuy d'un bon pere de famille, s'est contentee de tenir le baston leué dessus, sans frapper, pour luy donner loisir d'admirer & louer la bonté de son maistre & rentrer au deuoir.

De là apres auoir fait porter à Monheurt la peine de son indiscrete opiniastrerie; ton SOLEIL reuiet à toy, PARIS, sa bien-aymee, afin de donner loisir à ceux qui restent, de recognoistre sa grandeur; mais estans demeurez inflexibles, il retourne les voir, & part au mois d'Auril 1622. pour faire vne expedition plus glorieuse que celle de l'an passé; puisque la paix s'en est ensuiuie, apres que sa misericorde a surmonté sa force. Il lance en partant vn rayon de sa Majesté Royale sur la ville de la Rochelle, ordonnant Monseigneur le Côte de Soissons Prince de son sang, pour y adiouster par sa valeur & prudence, vn desespoir d'eschapper, à l'esbrâlemét que cet autre rayon, Monsieur le Duc d'Espèrnon, luy auoit doné l'an passé.

Leué donc qu'il est en ce Printemps, il costoye, & nettoye les riuages depuis Nantes iusques en Poictou, les Sables d'Olonne, le Chasteau de la Chaume se consumét en ses approches, Luffon s'éuanoüit en la chaleur de ses raiz; les Marais de Rié retardent leur marée, *Soubs-bise* pour luy rendre à l'estroit celuy qui s'oppose à son cours, & luy faire eschanger son naufrage particulier, au general naufrage de sa cause. Il passe & surmôte par sa valeur ces signes mal-faisans; s'auâce en Xaintonge & la basse Guyenne, Taillebourg luy fait hommage; il contraint Royan reuolté à luy demander pardon, Saintefoy, Tonnins, Tonnins-sus, Tonnins-la force, Clairac, Maureuel, & autres, les vnes par amour, les autres par force, cedent à sa valeur. De là donnant au haut Languedoc, Saint-Antonin l'ayant éprouué luy crie mercy, Negreplisse opiniastre, attire à soy sa iuste colere, & dône l'espouuente à Cadenac, Figeac, Monflanquin, Carmain, Mas de Verdun, Môteucq, & Lombez éblouy d'un autre rayon, par Monseigneur le Duc de Vêdosme, ne veulent attendre la rigueur des armes, côme Negreplisse. Au bas Languedoc Bedelrioux, l'ayant voulu regarder baisse la veüe, & acquiesce enfin à ses forces: Monguion plus mal-conseillée les éprouue, se faisant piller & rançonner: Lunel aime mieux composer, que seruir d'une telle cure: Sômieres, Massigliarque, Pignâ, & autres villetes & chasteaux se rendent au bruit de sa venue. Aiguemortes, & les

mise sous sa puissance, cependant que Messieurs les Marechaux de Lesdiguières, & de Crequi portēt deux de ses rayōs plus vifs sur le Daupiné, pour y attirer l'obeyssance de Baiz-sur-Baiz & du Pouzin.

Or ce cours d'un si rare Soleil, qui se faict par ces battemens, pour chasser les tenebres d'un air troublé de rebellio, promet en fin quelque beau iour à ses sujets affligez & malades: Le mal est en sa crise; Il faut consulter les Medecins de Montpellier, qui scauent tirer des antidotes & remedes aux poisons des Scorpions & des Viperes. Montpellier, qui souliez estre la rareté des jardins du Roy, qui fournissiez & les bōs Medecins, & les herbes medicinales, & preseruatifs cōtre les venins, qui dōniez encore aux Dames les eaux de Naphé, & les poudres de Cypre; Cypre subiette à la mere d'Amour, ne cōtribueriez vous rien du vostre, pour ioindre cette Deesse de paix à nostre Soleil qui paroist en Mars deuāt vous? vos bons remedes seront-ils changez en razors, vos medecines en poisons, vos bonnes odeurs en puantes rebellions? Le malade est affoibly par tant de saignées si souuent reiterees, presentez au Roy quelques bōs vngueuts pour les appliquer sur vos playes: soyez cause que de la cōionctiō de nostre Mars avec la Venus d'une paix durable, il s'engendre des enfans adulteres, des guerres estrangeres eschāgees aux intestines. Et que l'honneur vous demeure à jamais, d'auoir faict passagē à la tranquillité publique par vos portes, pour porter les armes du Roy aux lieux, où sa reputatiō, la iustice, la protectiō de ses alliez, la sienne propre, & l'honneur de sa Couronne les appelle.

O Dieu que vous estes puissant! & d'autāt plus admirable que vous auez ordonné vn Soleil qui departe vos vertus effacées à toute generation & regeneration des choses qui seuent icy bas à l'entretien de nostre vie, & que vous auez establi des Roys qui ayent les mesmes puissances & facultez que le Soleil, qui fait que nous les honorons cōme vos viues images. Vous auez ordonné le Soleil pour faire renaistre les fruiets de la terre, & d'un huer auoit enseuclis: Et les Roys pour

plus de solde & de distribution de pain à ceux qui sont morts.

Retirez vous donc, Messieurs, à qui ceste paix est ennuieuse, contentez vous du plaisir & volonté du Roy, pour la raison que vous en voudriez exiger. Les Geometriens veulent qu'on leur accorde quelques certaines propositions sans les prouuer. Et il appartient bien aux Rois de faire des actions, desquelles ils ne soient obligez de rendre compte à personne, l'arc de l'alliance qu'il a renoüee avec ses peuples qui ont reclamé sa misericorde, les lettres patentes qui leur assurent sa clemence vous doiuent suffire. Clemence qui s'estendant iusques aux plus opiniastrés, a aussi tost attiré les raïncunes de leurs volontés, esloignées du deuoir, pour les conuertir en obeyssance, tout ainsi que la bourse du fiel pénétrant par ses racines dans la substance du foye, en attire la colere superflüe, & la sequestrant du sang, le rend plus apte à fournir de nourriture seruant à l'entretien de la vie.

Vostre clemence, SIRE, si benignement departie lors que vostre puissance vous en auoit donné moins de subject, faict confesser à tout le mōde, que vous estes veritablemēt fort; car la force, cōme dict le Docteur Angelique, ne cōsiste pas plus à entreprendre, qu'à pātir, & si vous avez sceu bien dompter par vostre valeur ceux qui se sont rēdus obstinez, vous avez avec plus de courage supporté le peu de tort qui vous pouuoit estre faict par le reste, en luy donnāt les arres de vostre misericorde, de laquelle vous remercie tres humblement vostre bonne ville de Paris, ces Bourgeois fideles qui se recognoissent gratifiez en ceste paix, se donnant du contentement de l'obeyssance qui vous a esté en fin renduë, comme ils s'estoiēt tenus interessez dans les iniures qui estoient faictes aux grādeurs & à l'autorité de vostre Majesté. Puissiez vous goustier les effects des prieres, & bons souhaits, joincts à l'amour & l'obeyssance d'un peuple si loyal. Puissēt aussi tous vos subjects en general vous honorer, cherir, & seruir de toute leur affectiō: Puissiez vous de mesme leur departir vn mutuel amour, les faire longtēps jouyr de cette paix, sur tout de vostre presence agreable, & receuoir à iamais les graces & benedi-